

ČETVRTA GODIŠNJA KONFERENCIJA I GENERALNI SASTANAK
MEĐUNARODNE ASOCIJACIJE ANTIKORUPCIJSKIH ORGANA

MAKAO, 2-5. NOVEMBAR 2010. GODINE

MAKAO DEKLARACIJA

Mi, predstavnici antikorupcijskih organa 144 države članice Ujedinjenih nacija i regiona i 12 međunarodnih organizacija, sastali smo se u Makau, Kina, radi održavanja Četvrtе godišnje konferencije i Generalnog sastanka Međunarodne asocijacije antikorupcijskih organa (International Association of Anti-Corruption Authorities – IAACA), posvećene „Međunarodnoj saradnji“ (Poglavlje IV UNCAC-a):

Podsjećajući na rezoluciju Generalne skupštine 58/4, kojom je Skupština usvojila Konvenciju Ujedinjenih nacija protiv korupcije i odredila 9. decembar kao Međunarodni dan borbe protiv korupcije,

Podsjećajući i na sve relevantne rezolucije Generalne skupštine i Ekonomskog i socijalnog Savjeta Ujedinjenih nacija koje pozivaju na brzu ratifikaciju i punu implementaciju Konvencije Ujedinjenih nacija protiv korupcije (United Nations Convention against Corruption – UNCAC),

Podsjećajući dalje na naše Deklaracije iz Pekinga, Balijsa i Kijeva, kao i na preporuke koje su donijete na sastanku u okviru Konferencije država potpisnica Konvencije Ujedinjenih nacija protiv korupcije (Conference of the State Parties to the United Nations Convention against Corruption – CoSP), održane u Jordanu, u zajedničkoj organizaciji UNODC i IAACA,

Svjesni važnosti rezolucija koje je usvojio CoSP na svom prvom, drugom i trećem zasjedanju,

Uvjereni u značajan doprinos koji civilno društvo i odgovarajuće stručne organizacije mogu pružiti efikasnoj primjeni UNCAC-a,

1. *Izražavamo svoju zahvalnost Kancelariji državnog tužioca Posebnog administrativnog regiona Narodne Republike Kine Makaoa na organizaciji Četvrtе godišnje konferencije i Generalnog sastanka Međunarodne asocijacije antikorupcijskih organa, kao i duboku zahvalnost Vladi i stanovnicima Kine na srdačnoj gostoljubivosti;*

2. *Izražavamo svoju zahvalnost i Vladi Brazila, a posebno Kancelariji glavnog kontrolora finansija na organizaciji sastanka Izvršnog odbora Asocijacije u Salvadoru, aprila 2010. godine;*

3. *Naglašavamo* ključni značaj efikasne primjene mjera međunarodne saradnje, u skladu sa odredbama sadržanim u Poglavlju IV UNCAC-a, kao važne obaveze i odgovornosti država ugovornica i ključne dopune preventivnim i krivično-pravnim mjerama Konvencije;
4. *Prepoznajemo* da se mjere međunarodne saradnje mogu efikasno sprovesti u kontekstu potpuno osposobljenog, modernog, pravičnog, efikasnog i humanog krivično-pravnog sistema, koji poštuje i štiti ljudska prava i promoviše vladavinu prava;
5. *Sa zadovoljstvom pozdravljamo* činjenicu da je 148 država ratifikovalo ili pristupilo UNCAC-u i pozivamo Vlade i Parlamente zemalja koje to još uvijek nijesu učinile da ubrzaju potrebne unutrašnje procedure, kako bi što prije ratifikovale ili pristupile Konvenciji, u cilju dostizanja univerzalnog poštovanja Konvencije;
6. *Konstatujemo sa uvažavanjem* rezultate Šestog globalnog foruma za borbu protiv korupcije i očuvanje integriteta, održanog u Dohi u novembru 2009. godine, *pozivamo* antikorupcijske organe da usvoje preporuke koje su date na forumu, i *pozdravljamo* odluku da se osnuje Inicijativa globalnog foruma, kako bi se objedinilo međunarodno djelovanje u borbi protiv korupcije i omogućilo Konferenciji država ugovornica UNCAC-a da maksimalno poveća svoj potencijal i uticaj;
7. *Takođe pozdravljamo*, sa velikim zadovoljstvom i još većim očekivanjima, važne odluke koje su donijete na trećoj sjednici Konferencije država potpisnica, održanoj u Dohi, novembra 2009. godine, a koje je podržala Generalna skupština Ujedinjenih nacija na njenom 64. zasjedanju;
8. *Izražavamo* svoje zadovoljstvo uspostavljanjem Mehanizama za evaluaciju primjene UNCAC-a i obećavamo nepokolebljivu podršku naporima na dostizanju njegovog punog i efikasnog funkcionisanja;
9. *Pohvaljujemo* UNODC za izuzetan rad u obavljanju funkcija Sekretarijata Konferencije država ugovornica i njenih pratećih tijela;
10. *Ponovo naglašavamo* ključnu ulogu Konferencije država ugovornica i ponovo pozivamo Izvršni odbor Međunarodne asocijacije antikorupcijskih organa da, u konsultaciji sa Sekretarijatom Konferencije, potraži odgovarajuće načine za uspostavljanje bliskih veza između IAACA i Konferencije, kako bi se povećali uključenost i doprinos Asocijacije i njenih članova u primjeni preporuka datih na Konferenciji;
11. *Pozivamo* sve države ugovornice UNCAC-a da izrade i primijene odgovarajuće programe rada, kako bi se održao, produžio i ojačao impuls koji je stvorila Konvencija, a posebno u periodima između redovnih zasjedanja Konferencije;
12. *Preporučujemo* da antikorupcijski organi aktivno učestvuju u naporima da se razviju i usavrše naučni metodi mjerenja korupcije kroz precizne i objektivne podatke o njenoj pojavi i uticaju, i pozivamo UNODC da podrži ovaj proces;

13. *Naglašavamo* značaj odluke donešene na trećoj sjednici Konferencije država ugovornica da se u rad Grupe za evaluaciju primjene integriše tehnička pomoć i ističemo upotrebu Sveobuhvatnog upitnika za samoevaluaciju, radi identifikacije potreba država ugovornica za tehničkom pomoći, posebno potreba antikorupcijskih tijela;

14. *Pozdravljamo* odluku niza država ugovornica da iskoriste Upitnik za sveobuhvatnu analizu potreba i shodno tome izrade nacionalne strategije i akcijske planove;

15. *Ohrabrujemo* UNODC da nastavi da zemljama u razvoju i zemljama čije su privrede u tranziciji na njihov zahtjev pruža širok spektar pomoći za izgradnju kapaciteta, tehničke stručnosti i politike razvoja. U tom smislu, *preporučujemo* multilateralnim i bilateralnim pružateljima tehničke pomoći da integrišu Konvenciju u svoje aktivnosti i povećaju sredstva za podršku zemljama u razvoju u implementaciji Konvencije, u bliskoj saradnji sa UNODC i IAACA, kako bi se što više iskoristila njihova znanja iz ove oblasti;

16. *Pozivamo* države ugovornice da usvoje neophodne zakone i politike, kako bi antikorupcijskim organima, uključujući one koji su specijalizovani za borbu protiv korupcije kroz sprovođenje zakona, bilo omogućeno da obavljaju svoje dužnosti nezavisno, uz obezbijedena stabilna sredstva, stručno osoblje i profesionalne obuke, kao i da izvršavaju svoje zadatke efikasno i bez ikakvog neprimjerenog uticaja, u skladu sa članovima 6 i 36 Konvencije;

17. *Takođe pozivamo* države potpisnice da postignu odgovarajuću ravnotežu u ovlašćenjima antikorupcijskih tijela, posvećujući dužnu pažnju i njihovoj važnoj preventivnoj ulozi i ključnim nadležnostima koje imaju za sprovođenje zakona, zavisno od institucije, koje su od značaja za primjenu odgovarajućih odredbi Konvencije i unapređenje međunarodne saradnje;

18. *Pozivamo* Vlade da započnu odgovarajuće reforme koje promovišu neophodnu stručnost svojih organa za sprovođenje zakona i krivično gonjenje, nezavisnost i integritet sudstva, kao i sprečavanje sukoba interesa u obavljanju javne funkcije, slobodni pristup informacijama i transparentnost i odgovornost u obavljanju javne funkcije, jer su ovo ključni stubovi efektivne prevencije i suzbijanja korupcije;

19. *Pozdravljamo* nacionalne, regionalne i međunarodne inicijative za promociju antikorupcijskih obuka i edukacija, i *pohvaljujemo* Generalnog sekretara Asocijacije za zaključivanje ugovora i sporazuma o unapređenju saradnje sa relevantnim institucijama i organizacijama;

20. *Ponovo pozivamo* Izvršni odbor IAACA da istraži mogućnosti pokretanja posebnog časopisa koji bi sadržavao najvažnije sudske presude u slučajevima korupcije i pranja novca, koji bi poslužio kao »alatka« ljudima od struke;

21. *Izražavamo zadovoljstvo* zajedničkim aktivnostima UNODC i Inicijative Svjetske banke za povraćaj ukradene imovine (StAR), i pozivamo sve države da nastave sa aktivnim pružanjem podrške Inicijativi i implementacijom odredaba Konvencije koje se odnose na povraćaj imovine;

22. *Izražavamo svoju duboku zahvalnost* relevantnim međunarodnim organizacijama, civilnom društvu i medijima na podizanju javne svijesti o UNCAC-u i ozbiljnosti različitih oblika korupcije, kao i na stalnoj podršci i saradnji sa IAACA i Konferencijom država članica, i ističemo značaj zaštite svjedoka, stručnjaka, žrtava, tužilaca, sudija i svih drugih lica uključenih u antikorupcijske aktivnosti;

23. *Odobravamo* proširenje Izvršnog odbora, kao što je odlučeno na našem prethodnom Generalnom sastanku, i podržavamo preporuke koje su tada date;

24. *Donosimo odluku* o osnivanju radne grupe za izradu plana rada Asocijacije, koji će se zasnivati na nacrtu koji je bio podijeljen učesnicima konferencije, kao i na svim komentarima i predlozima koje članovi budu poslali Sekretarijatu;

25. *Dajemo ovlašćenje* radnoj grupi da dovrši svoj posao i pošalje revidirani plan rada Izvršnom odboru najkasnije šest mjeseci prije sljedeće godišnje konferencije i generalnog sastanka, i *zahtijevamo* od Izvršnog odbora da pregleda, ocijeni i proslijedi revidirani program rada svim članovima najkasnije tri mjeseca prije sljedeće godišnje konferencije i generalnog sastanka;

26. *Donosimo odluku* da odgovarajući antikorupcijski organi tekst ove Deklaracije objave u svojim zemljama i da tekst bude dostavljen Konferenciji država članica Konvencije Ujedinjenih nacija protiv korupcije, Generalnoj skupštini i drugim odgovarajućim tijelima Ujedinjenih nacija.